



Blers alpinists han er durmi il 2013 en la chamona Terri.

MAD

# Durmir sper ils chamutschs è moda

## Chamonas dal Club Alpin Svizzer

DA GION NUTEGN STGIER / ANR

■ **Las pernottaziuns en las chamonas grischunas dal Club Alpin Svizzer èn s'augmentadas l'onn passà per 7,8%. Total han las 30 chamonas fatg 71 346 pernottaziuns. Duas chamonas grischunas sa chattan schizunt tranter las top diesch en Svizra.**

L'onn passà ha il Club Alpin Svizzer festivà il giubileum da 150 onns. Da preschent ha il club 143 000 commembers e cun quel dumber è il Club Alpin Svizzer, naziunal, la 5avla pli gronda uniun da sport. Secziuns ha il Club Alpin Svizzer 111 e da quellas èn 9 secziuns da noss chantun. Quai èn las suandantas secziuns: Arosa, Bernina, Bregaglia, Engiadina Bassa, Partenz, Piz Platta, Rätia, Tavau e Terri. Il club che unescha alpinistas ed alpinists ha en tut 152 chamonas cun 9200 posts per durmir e da quels sa chattan bunamain 1500 en il Grischun. L'onn da giubileum dal Club Alpin Svizzer, il 2013, han las 152 chamonas registrà 322 000 pernottaziuns e quai èn 4% dapli che anc l'onn precedent. En il Grischun han pernottà l'onn passà en

las chamonas dal Club Alpin Svizzer 71 346 persunas e quai èn 7,8% dapli che anc l'onn avant. Dentant che èn las chamonas grischunas èn las pernottaziuns l'enviern s'augmentadas per 8,1% èn quellas en las autras regiuns da la Svizra sa reducidas per 2,7%.

### Damain pernottaziuns en il Vallais

Cun dar in sguard sin las pernottaziuns da las chamonas en autras regiuns, lura dat en egl che las chamonas en il Vallais han fatg l'onn passà cun 99 654 pernottaziuns 1,8% damain che anc l'onn 2012. En las chamonas da las Alps glarunaisas e songalaisas èn las pernottaziuns s'augmentadas per 17% ed en las chamonas da la Svizra centrala han pernottà il 2013 gist 11% daplis alpinists ed alpinistas. En il chantun Berna han las 33 chamonas dal Club Alpin Svizzer registrà l'onn passà cun 56 412 pernottaziuns medem bleras sco l'onn 2012. Il stgomi net da las pernottaziuns da tuttas chamonas en Svizra è cun 7,5 milliuns francs per 8% pli aut l'onn da giubileum che anc l'onn precedent. La svieuta netta da las consumaziuns è tar 19,5 milliuns francs e quai èn 7% dapli che anc il 2012.

Cun in total da 7384 pernottaziuns è la chamona Monte Rosa en Svizra quella che ha fatg il 2013 las pli bleras pernottaziuns, malgrà ina sminuziun da 10,2%. Duas chamonas da noss chantun cumparan er tranter las top diesch da la Svizra e quai èn la chamona Terri sin plaz 8 e la chamona Maighels sin plaz 9. Omaduas chamonas tutgan a la Secziun Piz Terri.

## Statistica pernottaziuns

Las top diesch chamonas grischunas:

Terri	5302	+ 3,2%
Maighels	5235	+11,1%
Kesch	4916	+16,5%
Carschina	4437	+10 %
Tschierva	4173	+ 4,7%
Sao Seo	3869	+23,6%
Silvretta	3802	+11,3%
Jenatsch	3718	+16,5%
Tuoi	3424	- 5,8%
Boval	3376	+14,7%